

Awe mainta lo informa prensa

PROCEDURA NOBO PA STACIONAMENTO DI TRAILER

Lo bai na asigna sitio pa bo para y no abo por solicita pe

ORANJESTAD (APA) Pa awe mainta 10'or lo tin un conferencia di prensa na Oficina Auxiliar di gobierno na Noord, unda un biaha lo delibera riba e permiso pa ponemento di trailer banda di ruta di Carnaval, cu ta tuma

lugar dia 10 di februari.

Aña pasa, tabatin un conferencia di prensa caba, unda debidamente a splica e procedura caba, unda Domeinbeheer lo bai na parcela henter e ruta, y interesadonan por hasi un peticion pagando pa

e parcela desea cu nan a solicita pè.

Tur hende por biba cu e pensamiento aki, ya cu di un manera of otro mester bin cu reglamentacion, ya cu publico no ta atene su mes na peticion di parti di polis pa

cu stacionamento di e traileran.

Pero kico ta pasando awor? Despues cu e diferente departamentonan, manera di Polis, DOW, Domeinbeheer y SAC a yega na e procedura, gobierno a deshasi di e pensamiento aki. Y ta esaki lo ser participa awe mainta den e conferencia di prensa aki.

Segun nos informante, gobierno a dicidi cu no tin tempo pa perde cu dunamento di permiso. Tur hende inatereza pa staciona un trailer banda di e ruta, ta hasi un peticion na Domeinbeheer. Aki tur e peticionnan ta bai den un tombola y riba e fecha stipula, lo bai na saca nan y ta Domeinbeheer lo bai na bisa unda bo por bai para bo trailer.

Pues e situacion nobo aki ta crea e situacion, cu no ta

abo ta dicidi unda bo kier para bo trailer, manera originalmente e pensamento tabata, pero Domeinbeheer ta asigna bo e sitio unda abo por bai para. Esaki tin como consecuencia, cu gruponan cu semper a para hunto, ta ser kibra for di otro.

O manera semper tin alternativa, si mi sa unda bo ta para y mi kier para banda di bo, anto mi ta bai negocia cu bo bisiña pa haya e lugar. Esta si e mes ta interesa unda abo a haya asignacion pa para. Nos ta mira cu e situacion nobo aki lo bai hasi e situacion mas dificil atrobe. E ta bolbe bira un tutu.

Awe mainta nos lo tende mas di e procedura nobo di gobierno riba esaki. Ohala no ta manera nos ta relatando aki, ya cu el o ta blanco di critica atrobe.